

МОНГОЛ УЛС ШАДАР САЙДЫН ТУШААЛ

20 18 оны 03 дугаар
сарын 16 -ны өдөр

Дугаар 24


Улаанбаатар
хот

Журам батлах тухай


Монгол Улсын Засгийн газрын тухай хуулийн 24.2 дахь хэсэг, Гамшгаас хамгаалах тухай хуулийн 36.4 дэх хэсэгт заасныг тус тус үндэслэн ТУШААХ нь:

1. "Гамшгаас хамгаалах сайн дурын ажиллагааны нийтлэг журам"-ыг хавсралтаар баталсугай.
2. Энэхүү журам батлагдсантай холбогдуулан Монгол Улсын Шадар сайдын 2016 оны 34 дүгээр тушаалыг хүчингүй болсонд тооцсугай.
3. Журмын хэрэгжилтэд хяналт тавьж ажиллахыг Онцгой байдлын ерөнхий газрын дарга (хошууч генерал Т.Бадрал)-д даалгасугай.

Монгол Улсын Шадар сайд



Ө.ЭНХТҮВШИН



ГАМШГААС ХАМГААЛАХ САЙН ДУРЫН АЖИЛЛАГААНЫ НИЙТЛЭГ ЖУРАМ

Нэг. Нийтлэг үндэслэл

- 1.1. Энэхүү журмын зорилго нь гамшгаас хамгаалах үйл ажиллагаан дахь сайн дурынхны оролцоог нэмэгдүүлэх, удирдлага зохион байгуулалт, эрх, үүргийг тодорхойлох, сургалт дадлага, нийгмийн баталгаатай холбогдон үүсэх харилцааг зохицуулахад оршино.
- 1.2. Сайн дурын хэсгийн үйл ажиллагааны эрх зүйн үндэс нь Гамшгаас хамгаалах тухай хууль, Галын аюулгүй байдлын тухай хууль болон бусад холбогдох хууль, тогтоомж байна.
- 1.3. Сайн дурын хэсгийн ажилтан гамшгаас хамгаалах үйл ажиллагаанд үүрэг гүйцэтгэхдээ холбогдох хууль тогтоомжийг мөрдлөг болгон ажиллана.
- 1.4 Энэхүү журамд нийцүүлэн тухайн орон нутгийн удирдлага сайн дурын үйл ажиллагааг зохион байгуулах журмыг батлан мөрдүүлж болно.
- 1.5. Сайн дурын хэсгийн ажилтныг тусгай сургалтад хамруулан сайн дурын аврагч, гал сөнөөгч бэлтгэнэ.

Хоёр. Гамшгаас хамгаалах сайн дурын ажиллагааны үндсэн чиглэл

- 2.1. Гамшгаас хамгаалах сайн дурын ажиллагаа нь дараах үндсэн чиглэлтэй байна:
 - 2.1.1.гамшгаас урьдчилан сэргийлэх, эрсдэлийг бууруулах;
 - 2.1.2.гамшгийн үед эрэн хайх, аврах, хор уршгийг арилгах;
 - 2.1.3.гамшгийн дараах хүмүүнлэгийн тусламж үйлчилгээ, сэргээн босгох ажиллагаа.

Гурав. Гамшгаас хамгаалах сайн дурын ажиллагааны зарчим

- 3.1. Гамшгаас хамгаалах сайн дурын ажиллагаа нь дараах зарчимтай байна:
 - 3.1.1. хүмүүнлэг энэрэнгүй, шуурхай, байх;

3.1.2. нийтийн эрх ашгийн төлөө, нэгдмэл байх;

3.1.3. шударга, ашгийн төлөө бус байх.

3.1.4. иргэд, олон нийтэд тулгуурлана.

Дөрөв. Сайн дурын хэсгийн ажилтанд тавигдах ерөнхий шаардлага

4.1. Сайн дурын хэсгийн ажилтанд дараах ерөнхий шаардлага тавигдана.

4.1.1. Монгол Улсын иргэн, тус улсад хууль ёсоор оршин сууж байгаа гадаад улсын иргэн байна;

4.1.2. Насны хязгаар 18-60 байна;

4.1.3. Гамшгаас хамгаалах сайн дурын ажиллагаа явуулах чиглэлээр мэдлэг, чадвартай байх;

4.1.4. Сэтгэцийн болон бие бялдрын хувьд эрүүл байх.

Тав. Сайн дурын хэсгийн удирдлага, зохион байгуулалт

5.1. Сайн дурын хэсгийн ажилтныг онцгой байдлын асуудал эрхэлсэн төрийн захиргааны байгууллагын даргын баталсан "Гамшгаас хамгаалах сайн дурын ажиллагааны заавар"-ын дагуу бүртгэж, сайн дурын хэсгийг гамшиг, ослын нөхцөл байдал, хэрэгцээ шаардлагад нийцүүлэн тухайн орон нутгийн Засаг даргын шийдвэрээр байгуулна.

5.2. Сайн дурын хэсгийг тусгай хөтөлбөрийн дагуу сургалтад хамруулж, орон нутгийн онцгой байдлын байгууллагаас гэрчилгээ, үнэмлэх олгоно.

5.3. Сайн дурын хэсгийг шаардлагатай үед нэгдсэн удирдлага, зохион байгуулалтад оруулж, Засгийн газрын 2011 оны 340 дүгээр тогтоолоор баталсан "Гамшгийн үед хүч хэрэгслийг дайчлан гаргах журам"-ын дагуу гамшгаас хамгаалах үйл ажиллагаанд оролцуулна.

5.4. Сайн дурын хэсэг нь гамшгаас хамгаалах үйл ажиллагаанд оролцохдоо тухайн үйл ажиллагааг удирдан зохион байгуулж байгаа онцгой байдлын байгууллагын албан хаагч, бусад албан тушаалтны удирдлага дор үүрэг гүйцэтгэнэ.

5.5. Сайн дурын хэсэг нь үйл ажиллагаагаа орон нутгийн Засаг дарга, онцгой байдлын байгууллагад тайлагнана.

5.6. Сайн дурын хэсгийн ажилтан байгуулсан гэрээ, ажлын чиг үүргээ биелүүлээгүй, хууль тогтоомж зөрчсөн, ажил үүргээ сайн дураараа гүйцэтгэхээс татгалзсан, өөр орон нутагт шилжин суурьших болсон, цэргийн жинхэнэ албанд татагдсан, нас барсан, гэмт хэрэгт холбогдсон тохиолдолд гамшгаас хамгаалах сайн дурын ажиллагааны гэрээг цуцалж, бүртгэлээс хасалт хийнэ.

5.7.Сайн дурын хэсэг нь шаардлагатай үед түргэн цугларах, үйл ажиллагаагаа явуулах төлөвлөгөөтэй байна.

Зургаа. Сайн дурын хэсгийн ажилтны эрх, үүрэг

6.1.Сайн дурын хэсгийн ажилтан дараах эрх эдэлнэ:

6.1.1.ажиллах нөхцөлөөр хангагдах;

6.1.2.ажлын чиг үүргээ гүйцэтгэхэд шаардлагатай мэдээ, мэдээлэл авах;

6.1.3.гамшиг, ослын зөвшөөрөгдсөн бүсэд нэвтрэн үүрэг гүйцэтгэх;

6.1.4.аюулгүй байдал, хувийн мэдээллээ хамгаалуулах;

6.1.5.гамшгийн голомтод ажилласан тохиолдолд эрүүл мэндийн нөхөн сэргээх эмчилгээнд хамрагдах;

6.2.Сайн дурын хэсгийн ажилтан дараах үүрэг хүлээнэ:

6.2.1.гамшгаас хамгаалах дайчилгаанд бэлэн байх, шаардлагатай тохиолдолд үүрэг гүйцэтгэх;

6.2.2.үйл ажиллагаандаа хөдөлмөр хамгаалал, аюулгүй ажиллагааг сахих, өөрийн болон бусдын аюулгүй байдлыг хангаж, үүрэг гүйцэтгэх;

6.2.3.гамшгаас хамгаалах чиглэлээр хийж гүйцэтгэсэн ажлаа сайн дурын хэсгийн ахлагчид тайлагнах;

6.2.4.ажил эрхэлдэг бол ажил олгогчоос чөлөө, зөвшөөрөл авах;

6.2.5.хувь хүний болон нийгмийн ёс зүйн хэм хэмжээг сахих, байгууллагын дотоод үйл ажиллагаанд оролцохгүй байх.

Долоо.Орон нутгийн Засаг дарга, Онцгой байдлын байгууллагын эрх, үүрэг

7.1.Орон нутгийн Засаг дарга гамшгаас хамгаалах сайн дурын ажиллагаанд дараах эрх, үүргийг хэрэгжүүлнэ:

7.1.1.сайн дурын хэсгийг байгуулах, сургаж бэлтгэх, томилгоожуулах, татан буулгах;

7.1.2 сайн дурын хэсгийн ажилтантай гэрээ байгуулж, үр дүнг үнэлж дүгнэх;

7.1.3.сайн дурын хэсгийг үүрэг гүйцэтгэхэд шаардлагатай техник, багаж хэрэгсэл, хувцсаар хангах;

7.1.4. сайн дурын хэсгийн бэлтгэл бэлэн байдлыг хангуулж, үйл ажиллагаанд хяналт тавих;

7.1.5. сайн дурын хэсгийн ажилтны аюулгүй байдлыг хангах, эрхийг хамгаалах;

7.1.6. сайн дурын хэсгийн ажилтныг шагнаж урамшуулах, шагналд тодорхойлох, олон нийтэд сурталчлан таниулах;

7.1.7. гамшгаас хамгаалах сайн дурын үйл ажиллагаанд шаардагдах санхүүжилтийг тухайн шатны Иргэдийн төлөөлөгчдийн хуралд санал оруулж шийдвэрүүлэх;

7.2. Орон нутгийн онцгой байдлын байгууллага гамшгаас хамгаалах сайн дурын ажиллагаанд дараах эрх, үүргийг хэрэгжүүлнэ:

7.2.1. сайн дурын хэсгийг байгуулах, сургаж бэлтгэх, томилгоожуулах, техник, багаж хэрэгслээр хангах асуудлаар орон нутгийн Засаг даргад заавар, зөвлөмж өгч мэргэжлийн удирдлагаар хангах;

7.2.2. сайн дурын хэсгийн мэдээллийн санг бүрдүүлэх, хөтлөх;

7.2.3. сайн дурын аврагч, гал сөнөөгчийг тусгай хөтөлбөрийн дагуу сургаж бэлтгэх, ажлын чиг үүргийг тодорхойлж батлах;

7.2.4. сайн дурын хэсгийг мэргэжил, арга зүйн удирдлагаар хангаж, үйл ажиллагаанд нь дэмжлэг үзүүлэх;

7.2.5. сайн дурын хэсгийн ажилтныг онцгой байдлын албаны нэрэмжит шагналаар шагнаж урамшуулах, олон нийтэд сурталчлан таниулах;

7.2.6. сайн дурын хэсгийн бэлтгэл бэлэн байдал, үйл ажиллагаанд хяналт тавих, мэргэжлийн дүгнэлт гаргах.

7.2.7. сайн дурын хэсгийн үйл ажиллагааг орон нутгийн онцгой байдлын байгууллагын гамшгаас хамгаалах төлөвлөлт, бэлэн байдлын асуудал хариуцсан ажилтан хариуцна.

Найм. Сайн дурын хэсгийн сургалт, дадлага

8.1. Сайн дурын хэсгийн сургалт, дадлагыг батлагдсан хөтөлбөрийн дагуу орон нутгийн хэмжээнд Засаг дарга, Онцгой байдлын байгууллага, Улаан загалмайн хороотой хамтран зохион байгуулна.

8.2. Сайн дурын хэсгийн сургалтын хөтөлбөрийг тухайн орон нутгийн онцгой байдлын байгууллагын дарга батална.

8.3. Сайн дурын хэсгийн дадлага сургалтыг орон нутгийн онцгой байдлын байгууллагыг түшиглэн жилдээ 2-оос доошгүй удаа зохион байгуулна.

Ес.Сайн дурын хэсгийн ажилтны нийгмийн баталгаа

9.1. Ажлаас чөлөөлөгдөн гамшгийн голомтод үүрэг гүйцэтгэсэн сайн дурын хэсгийн ажилтныг үндсэн ажлаа хийсэнд тооцож, тухайн байгууллага нь цалин хөлсийг нь хэвээр нь олгоно.

9.2. Сайн дурын хэсгийн ажилтны ажил үүргээ гүйцэтгэхэд шаардагдах зардал, томилогдсон газарт очих, ирэх замын зардал, хоол, эмнэлгийн үзлэг, вакцинжуулалтад хамрагдах зэрэг зайлшгүй гарах зардлыг тухайн орон нутгийн Засаг дарга хариуцна.

9.3. Сайн дурын хэсгийн ажилтан гамшгаас хамгаалах үйл ажиллагаанд оролцох үед хөдөлмөрийн чадвараа түр алдсан, хөгжлийн бэрхшээлтэй болсон, амь насаа алдсан тохиолдолд түүнд болон түүний гэр бүлд Галын аюулгүй байдлын тухай хуулийн 14 дүгээр зүйлийн 14.2, Гамшгаас хамгаалах тухай хуулийн 36 дугаар зүйлийн 36.2 дахь хэсэгт заасны дагуу тэтгэмж, буцалтгүй тусламжийг тухайн орон нутгаас олгоно.

9.4. Сайн дурын хэсгийн ажилтанд гамшгаас хамгаалах үйл ажиллагаанд оролцсон ажлын үр дүнг харгалзан орон нутгийн Засаг дарга мөнгөн урамшуулал олгож болно.

Арав.Гамшгаас хамгаалах сайн дурын ажиллагааны санхүүжилт

10.1. Гамшгаас хамгаалах сайн дурын ажиллагааны санхүүжилтийг дараах эх үүсвэрээс бүрдүүлнэ:

10.1.1. улсын болон орон нутгийн төсөв;

10.1.2. олон улсын байгууллага, хандивлагч орнуудын зээл, тусламж, төсөл, хөтөлбөрийн хөрөнгө;

10.1.3. төрийн болон төрийн бус байгууллага, аж ахуйн нэгж, иргэдийн санаачилгаар хуримтлагдсан тусламж, хандивын хөрөнгө;

10.1.4. бусад эх үүсвэр;

10.2. Сайн дурын хэсгийн үйл ажиллагааны зардлыг орон нутгийн Засаг дарга хууль тогтоомжийн хүрээнд шийдвэрлэнэ.